

Herzlich willkommen uff unsere Inderneddseid! Do kennese emol gucke, woas in unserem Bägdierpark alles sou louß iss.

Der Park laigd wunnerschäi medde in de Nadur in Erleboch. Dess iss enn Ordsdaal vunn Feerd. Do konnme in aller Ruh – ohne Gedeens unn Rennerei – emol es bissel Zeid vebringe.

Ourewäller Bäige voller Woald sinn um die grouße Geheege midd de Diern außerumm. Desdewäije iss der Bägdierpark in Erleboch midd soine siewwe Hekdar oaner vunn de schenschde im Daideschloand. Dodezu hodder sisch in iwwer 60 Jahr gemoachd.

Uff dem ugfähr enn Kilomedier loange Rundwäg gibbds veel iwwer die Weld vunn de Gebirgsdiern zu erfahn – dess iss es Erlebniss fer die goanz Familie.

Goanz noh drou kenne die Oalde und die Junge gucke, wie die iwwer 200 Diern vunn fünf Erddaale läwwe douhn. Uff Infodaafle schdäihd noch e bissel mäiner dodezu druff. Alle Diern derfme a Fudder gäwwe – dess konnme oam Oigoang kaafe.

Dess, woasme vunn Oufoang ou vorkadde hodd, meischdens Diern aus de Bäige sou zu zaije, wiese in de Nadur läwe douhn, hodd bis heid im ourewäller Mittelgebirge klasse geklappd.

Erschd emol warns blouß e Lama und e paar Gaase, äwwer iwwer die Johnn sinn do goanz veel Diern vunn iwverroal dezukumme, a aus de houche Bäige vunn Siedamerika unn Zendralasien.

Kloane Kamele vunn de Oande, urische schwarze Rinner aussem Hymalaja, Kängurus unn grouße Laafveggel aus Ausdralien – die unn noch e paar oanern Diern kenne es goanze Joahr iwwer bedrachd wärn.

Weil se rischdisch gehalde wärn, bringe die Diern es goanze Jahr loang a Junge uff die Weld. Die sinn fer Kinner und Erwoachsene immer woas goanz Besonderes.

Fer e Picknick konnme uffem Schbeelpladz im Bägdierpark e Paus mache. Do iss a e Indioanerloandschafd midd Zelde unn Marterpfahl, woume schbeele unn veschnaufe konn.

Im Bägdiarpark konnme nedd blouß die Nadur erläwe, midd Diern zum oufasse. Es gibbd a Ougeboode fer Schulklasse, vunn de Abc-Schidze biss zu de Owwerschduuf. Die kenne do woas lerne. Feschd midd dezu kehrn a Veouschdaldunge wie de „Zauberhafde Bägdiarpark“ orre de „Härschdlische Mäikd“.

Rendiern dudd sisch a, emol inn de Erlenbescher Museumscheier vebaizugucke, die in emm Bauernhouf im Ord iss unn vunn Oaschdern biss zum erschde Advend offe hodd – oan Sunn- unn Feierdoache middoags vunn oans bis sechse. Dess koschd nixx.

Unn weil Feerd a fer so guude Werdschafde bekoand iss, dudd sisch a rendiern, oizukehrn, woanne de Bägdiarpark besuche dudd.

Guudes Esse unn Drinke gibbds iwverroal in de Gemeinde.

Offe hodde Bägdiarpark:

Im Summer (Abril bis Okdower):

jeden Doach vunn moijends um zäije bis owends um sechse

Im Winder (Nowember bis März):

Moondoachs bis Freidoachs middoachs vunn oanse bis um fünfe

Soamsdoachs, Sunndoachs unn Feierdoachs vunn elfe moijends bis

fünfe middoachs

Do isser:

Werner-Krauß-Straße, 64658 Fürth-Erlenbach

Ourufe: 0049-6253/2001-0

Schreiwe: tierpark-erlenbach@gemeinde-fuerth.de